

НЭГДҮГЭЭР БҮЛЭГ

НИЙТЛЭГ ҮНДЭСЛЭЛ

1. Монгол Улсын хууль тогтоомж, цэргийн тангараг, дүрмээр тогтоосон эрх зүйн болон ёс зүйн хэм хэмжээ, захирагч /дарга/-ийн тушаалаар тогтоосон дэг журмыг цэргийн алба хаагч чанд сахин биелүүлэхийг цэргийн сахилга гэнэ.

2. Цэргийн сахилга нь хуулиар хүлээсэн үүргээ нэр төртэй биелүүлэх албаны хариуцлага, итгэл үнэмшил, эх оронч үзэл, хүмүүжилд тулгуурлах ба дараах хэлбэрээр хэрэгжинэ:

2.1. цэргийн алба хаагч нь эх орноо хамгаалах, үндэсний аюулгүй байдлыг хангахад бэлэн байх, захирагчид ухамсартайгаар захирагдах итгэл үнэмшлийг төлөвшүүлсэнээр;

2.2. цэргийн алба хаагч нь цэргийн нийтлэг дүрмийн шаардлага болон өөрийн гүйцэтгэх үүрэг, хариуцлагаа ухамсарласнаар;

2.3. цэргийн анги, салбарт дэг журам тогтоон хэвшүүлсэнээр;

2.4. цэргийн сургалт бэлтгэлийг үр дүнтэй зохион байгуулж, түүнд цэргийн алба хаагчдыг бүрэн хамруулсанаар.

Захирагч нараас захирагдагсадынхаа нэр төрийг хүндэтгэж, тэдэнд эрх зүйн үндэслэл бүхий шаардлага, үлгэрлэн дуурайлгах, бахархах, итгэл үнэмшлийг бий болгох, биеэ дайчлах, тэсвэр хатуужлыг олгох аргуудыг чадамгай хослуулан хэрэглэснээр хангагдана.

3. Цэргийн сахилга нь цэргийн алба хаагч бүрээс дараах үүргийг биелүүлэхийг шаардана:

3.1. Монгол Улсын Үндсэн хуулиа дээдлэх, өргөсөн тангарагтаа үнэнч байж, цэргийн дүрмийг чанд сахин биелүүлэх;

3.2. цэргийн албыг үнэнч шударгаар хааж, цэргийн эрдэмд шамдан суралцаж, өөрийн хариуцсан зэвсэглэл, цэргийн техник, төрийн өмч хөрөнгийг хамгаалах;

3.3. мэдээллийн аюулгүй байдлыг хангах, төрийн болон албаны нууцыг хадгалах, хамгаалах;

3.4. ёслох, хүндлэх журмыг сахих;

3.5. ангийн байрлалаас гадагш явахдаа цэргийн алба хаагчийн нэр хүндийг өндөрт өргөн нийгмийн дэг журмыг үлгэр жишээчээр сахих.

4. Захирагч хуулиар хүлээсэн эрх, үүргийн дагуу цэргийн сахилга, дотоод дэг журмыг чанд биелүүлэхийг захирагдагсадаас шаардах, түүнийг биелүүлэх нөхцөлийг бүрдүүлэх, гүйцэтгэлд нь хяналт тавьж, ажиллах үүрэгтэй.

5. Захирагч албандаа амжилт гаргасан цэргийн алба хаагчийг сайшаан урамшуулах, сахилгын зөрчил гаргагчдад шийтгэл оногдуулах эрхтэй. Энэ эрхийг тухайн цэргийн алба хаагчийг захирч буй шадар болон шууд захирах дарга нар эдэлнэ.

6. Сахилга дэг журмыг хэвшүүлэх ажиллагаа, түүний үр дүнг ангийн захирагч бүрэн хариуцна.

7. Цэргийн алба хаагч цэргийн сахилгыг бэхжүүлэхэд захирагчид туслах үүрэгтэй. Энэ үүргийг биелүүлээгүй, зөрчил дутагдлыг нуун дарагдуулсан цэргийн алба хаагч сахилгын дүрмийн дагуу хариуцлага хүлээнэ.